

四庫全書薈要

• 乾隆御覽本

集部

遺山集卷六

金元好問撰

樂府

天門引

秦王深居不得近
從破衡成欲誰信
白頭游客困咸陽
憔悴黃金百斤盡
海中仙人黃鵠舉
大笑人間爭腐鼠
大夫何意作蘇秦
六印才堪警兒女
古來多為虛名老

不見阿房淨如掃千年虎豹守天門一日牛羊卧秋草

蛟龍引

古劍咸陽墓中得扶開青雲見白日蛟龍地底氣如虹
土花千年不敢蝕洪鑪烈焰初騰精橫海已覺無長鯨
世上元無倚天手匣中誰解不平鳴割城恨不逢相如
佐酒恨不逢朱虛尚方未入朱雲請盟槃合與毛生俱
誰念田文坐中客只將彈鋏嘆無魚

湘夫人詠

木蘭芙蓉滿芳洲白雲飛來北渚遊千秋萬歲帝鄉遠
雲來雲去空悠悠秋風秋月沅江渡波上寒烟引輕素
九疑山高猿夜啼竹枝無聲墮殘露

湘中詠

楚山鶴鳴風雨秋楚岸猿啼送客舟江山萬古騷人國
猿鳥無情也解愁西北長安遠於日憑君休上岳陽樓

孤劍詠

鬱鬱重鬱鬱夜半長太息吟成孤劍詠門外山鬼泣清

霜稜稜風入骨殘月耿耿燈映壁君不見一飢縛壯士僵
卧時自惜黃鵠一舉摩蒼天誰念樊籠束脩翼

渚蓮怨

阿溪何許來素面浣風雨寂寞烟中魂依依欲誰語

芳華怨

娃兒十八嬌可憐亭亭裊裊春風前天上仙人玉為骨
人間畫工畫不出小小油壁車軋軋出東華金縷盤雙
帶雲裾踏鴈沙一片朝雲不成雨被風吹去落誰家少

年豈無恩澤侯金鞍綉帽亦風流不然典取鵲鸛裘四
壁相如堪白頭金谷樓臺悄無主燕子不來花著雨只
知環珮作離聲誰向琵琶得私語無情鵲鵲翡翠兒有
情蜂雄蛺蝶雌勸君滿酌金屈卮明日無花空折枝

後芳華怨

江南破鏡飛上天三五二八清光圓豈知汴梁破來一
千日寂寞菱花仍半邊白沙漫漫車轆轤鯉鷄絃中杜
鵑哭塞門憔悴人不知枉為珠娘怨金谷樂府初唱娃

兒行彈碁局平心不平只今雄蜂雌蝶兩不死老眼天
公如有情白玉搔頭綠雲髮玫瑰面脂透肉滑春風着
人無氣力不必相思解銷骨落花絕品姚家黃揚州銀
紅一國香千圍萬繞看不足雨打風吹空斷腸丹砂萬
年藥金印八州督不及秦宮一生花裏活長門曉夕壽
相如儘著千金買瘡渴

結楊柳怨

長樂坡前一盃酒鄭重行人結楊柳可憐楊柳千萬枝

看看盡入行人手輕烟細雨綠相和惱亂春風態度多
路人愛是風流樹無奈朝攀暮折何朝攀暮折何時了
不道行人暗中老素衣今日洛陽塵白髮明朝塞城草
柳色年年歲歲青關人何事管離情春風誰向丁寧道
折斷柔條莫再生

秋風怨

碧瓦高梧響疎雨坐倚薰籠時獨語守宮一着死生休
狗走鷄飛莫為女雲間簫鼓夜厭厭禁漏誰將海水添

一春門外羊車過又見秋風拂翠簾
揔把丹青怨延壽
不知猶有竹枝鹽

歸舟怨

渡頭楊柳青復青
閨中少婦動離情
只從問得狂夫處
夜夜夢到洛陽城
南風吹櫓聲
北鴈鳴嚶嚶
江流望不極
相思春草生

征人怨

瀚海風烟掃易空
玉關歸路幾時東
塞垣可是秋寒早

一夜清霜滿鏡中

塞上曲

平沙細草散羊牛一簇征人在戍樓
忽見隴頭新鴈過一時迴首望南州

西樓曲

游絲落絮春漫漫西樓曉晴花作團
樓中少婦弄瑤瑟一曲未終坐長嘆
去年與郎西入關春風浩蕩隨金鞍
今年疋馬妾東還零落芙蓉秋水寒
并刀不剪東流水

湘竹年年露痕紫海枯石爛兩鴛鴦只合雙飛便雙死
重城車馬紅塵起乾鵲無端為誰喜鏡中約語人不知
欲插花枝淚如洗

後平湖曲

越女顏如花吳兒潔如玉天教並牆居不著同被宿美
人一笑千黃金連城不博百年心樓上牆頭無一物暮
爨朝春一生足秋風拂羅裳秋水照紅粧舉頭見郎至
低頭采蓮房郎心只如菱刺短妾意未覺藕絲長與郎

期何許眼礙同舟女春波澹澹無盡情雙星盈盈不得
語十里平湖艇子遲岸花汀草伴人歸鴛鴦驚起東西
去唯有蜻蜓接翅飛

消川行

消川道邊日欲西誰家少婦掩面啼漫漫長路行不徹
粉綿鏡衣手自携自言娼家女家在梁門東夫婿輕薄
兒新人不相容憶初在家時只辦放嬌慵爺娘惜女如
惜玉近前細看面發紅無端嫁作蕩子婦流落棄擲風

埃中可憐桃李花顏色嬌蒙茸朝看花枝好暮看花枝
空安得明珠三百斛重簾複幕圍春風

長安少年行

黃衫少年如玉筆生長侯門人不識道逢豪客問姓名
袖把金鞭側身揖卧馳行橐錦帕蒙石榴壓漿銀作筒
八月蒼鷹一片雪五花驕馬四蹄風日暮新豐原上獵
三更歌舞灞橋東

黃金行

王郎少年詩境新氣象慘澹含古春筆頭仙語復鬼語
只有溫李無他人天公著詩貧子身子曾不知乃自
人間不買詩名用一片青衫衡霍重兒貧女富母兩心
何論同袍不同夢入門喚婦不下機淚子垢面兒啼食
君詩只有貧女謠何曾夢見金縷衣外家翁媼日有語
嫁女書生徒爾為昆陽城下三更酒醉膽輪囷挿星斗
一昔詩腸老蛟吼十尺長人墮車走斫頭不屈三萬言
欲向何門復低首何人壽我黃金千使君破鏡飛上天

隋故宮行

渭川楊柳先得春二月鶯啼百轉新
長春宮中千樹錦
暖日晴雲思煞人
君王半醉唱吳歌
絳仙起舞嚙翠蛾
吳兒謾說曾行樂
三十六宮能幾多
千秋萬古金銀闕
海沒三山一毫髮
繁華夢覺人不知
留得寒蟬泣秋月

解劍行

古劍黑於漆
鬱鬱動星文
摩挲二十年
今日持贈君
長鯨鼓浪三山沒
知君不是泥中物
袖間一卷白猿書
未

分持刀買黃犢壯懷風雲鬱沈沈嬾媿漂母無千金長
安侏儒飽欲死萬古不解天公心北風浩浩吹行客隴
水無聲雪花白荆卿墓頭秋草乾擊筑行歌欲誰識君
不見秦相五殺皮去時烹雞炊戾戾又不見敝裘蘇季
子合從歸來印累累丈夫墮地自有萬里氣翕忽變化
安能知大冠如箕望吾子富貴同生亦同死

征西壯士謠

三十未有二十強手內蛇矛丈八長揔為官家金印大

不怕百死向沙場捉却賀蘭山下賊金鞍綉帽好還鄉

望雲謠

涉江采芙蓉芙蓉待秋風登山采蘭苕蘭苕霜早雕美人亭亭在雲霄鬱搖行歌不可招湘絃沈沈寫幽怨愁心歷亂如曳蠶金支翠蕤紛在眼春草迢迢春波遠

望歸吟

塞雲一抹平如截塞草離離卧榆葉長城窟深戰骨寒萬古牛羊飲冤血少年錦帶佩吳鉤獨騎足馬覓封侯

去時只道從軍樂不道關山空白頭北風吹沙雜飛雪
弓絃有聲凍欲折寒衣昨夜洛陽來腸斷空閨搗秋月
年年歲歲望還家此日歸期轉未涯誰與南州問消息幾
時重拜李輕車

梁園春五首

車駕還汴
京後作

軍從南去三迴勝雪自東來二尺強今歲長春多樂事

內家應舉萬年觴

長春德陵
誕節名

暖入金溝細浪添津橋楊柳綠纖纖賣花聲動天街遠

幾處春風揭綉簾

上苑春濃畫景閒
綠雲紅雪擁三山
宮牆不隔東風斷
偷送天香到世間

樓觀沈沈細雨中
出墻花木亂青紅
朱門不解藏春色
燕宿鶯喧處處通

雙鳳簫聲隔綵霞
宮鶯催賞玉谿花
誰憐麗澤門邊柳
瘦倚東風望翠華

龍德宮有玉谿館
麗澤燕都西門名

探花詞五首

禁裏蒼龍啟九闌殿前鸚鵡喚新班沈沈綠樹鞭聲遠
娟娟薰風扇影閑

浩蕩春風入綉鞍可憐東野一生寒皇州花好無人管
不用新郎走馬看

六十人中數少年風流誰占探花筵阿欽正使才情盡
猶欠張郎白玉鞭

李欽用二十七張夢祥少一歲又未婚云

美酒清歌結勝游紅衣先為渚蓮愁曲江共說櫻桃宴
不見西園風露秋

人物風流見藹然逼人佳筆已翩翩龍津春色年年在
莫着新銜惱必先

獵城南

翩翩游俠兒白馬如疋練朝出城南獵暮趁軍中宴北
平有真虎愛惜腰間箭

春風來

春風來時瑤草芳綠池珠樹宿鴛鴦春風去後瑤草歇
來鴻去燕遙相望鴛鴦不得雙燕鴻天一方娟娟愁眉

色靜與遙山長錦衾復羅薦夢語相思怨月明烏夜啼
空閨淚如霰

幽蘭

仙人來從舜九疑辛夷為車桂作旂疏麻導前杜若隨
披猖芙蓉散江蘺南山之陽草木腓澗崗重複人迹希
蒼崖出泉懸素霓脩然獨立風吹衣問何為來有所期
歲云暮矣胡不歸釣天帝居清且夷瑤林玉樹生光輝
自棄中野誰當知霰雪慘慘清入肌寸根如山不可移

雙麋不返夷叔饑飲芳食菲尚庶幾西山高高空蕨薇
露槃無人薦湘累山鬼切切雲間悲空山月出夜景微
時有彩鳳來雙棲

梅華

去歲梅華晚今歲梅華早和羹要佳實春風莫草草

寶鏡

寶鏡掛秋水青娥紅粉粧春風不相識白地斷肝腸

續小娘歌十首

吳兒公路唱歌行十十五和歌聲唱得小娘相見曲
不解離鄉去國情

北來游騎日紛紛斷岸長堤是陣雲萬落千村藉不得
城池留着護官軍

山無洞穴水無船單騎驅人動數千直使今年留得在
更教何處過明年

青山高處望南州漫漫江水遶城流願得一身隨水去
直到海底不回頭

風沙昨日又今朝踏碎鷓鴣頭路更遙不似南橋騎馬日
生紅七尺繫郎腰

鴈鴈相送過河來人歌人哭鴈聲哀鴈到秋來却南去
南人北渡幾時迴

竹溪梅塢靜無塵二月江南烟雨春傷心此日河平路
千里荆榛不見人

太平婚嫁不離鄉楚楚兒郎小小娘三百年來涵養出
却將沙漠換牛羊

饑鳥坐守草間人青布猶存舊領巾六月南風一萬里
若為白骨便成塵

黃河千里扼兵衝虞虢分明在眼中為向淮西諸將道
不須誇說蔡州功

遺山集卷六

欽定四庫全書

總校官庶吉士臣張能照

校對官編修臣閔惇大

膳錄監生臣吳申嵐

欽定四庫全書薈要

集部

遺山集卷八



遺山集卷七

金 元好問 撰

五言律詩

懷益之兄

世故伊川嘆鄉情越客音天宜他日定陸已向來沈冉
冉愁看老源源事益侵誰言易排遣自分不勝任鞭影
驚疲馬鍾聲急暮禽跼中無曠迹喧外有幽尋夢失名

家筆書存遺子金山田和石瘦茅屋過雲深春雨蔬成
圃秋霜柿滿林樹陰涼拂席花氣澹盈襟宿鷺窺晨汲
孤猿伴暝吟溪僧時問字野客或知琴抱璞休奇售臨
觴得緩斟阿兄團聚日曾話百年心

汴禪師自斲普照瓦為研以詩見餉為和二首
寺廢瓦不毀研奇功亦多已知良斲少更奈苦心何挺
挺剛無敵津津潤可呵羽陽陵谷變冰井字書訛贈比
黃金璞辭慙紫石歌遙知玉音在洗耳俟研磨

長吉有
紫石硯

歌

點化鉛仍見堅凝鐵易穿何年埋朽壤此日睹青天古
色秋烟重哀音夜雨懸有刀堪切玉是鏡不名塼佛塵
淪空劫書林結後緣禪河一勺水更擬就師傳

惡雨

惡雨惡復惡龍公何遽然霆轟冰塔碎電掣玉繩連高
岸皆深谷層霄一漏泉黑來疑擁海白散忽成烟市響
千門合潮頭萬弩穿天瓢休盡建上枯旱有他年

癸巳除夜

鼎定周元重薪安漢已然不隨南渡馬虛泛北歸船身
並枯蜩化心爭脫兔先塵埃嗟落薄光景強留連往事
青燈裏浮心白髮前更殘鍾未動猶屬出京年

病中

病因食猪動氣而作癸卯
四月二十一日晨起書

戰勝頗自恃寧知徒外腴文章工作祟時運迫推枯止
酒嗟何及燒猪本不圖膏粱無急變山澤有真懼詩信
藤條戲方遭鐵彈誣鹽去聲紅忘後顧鰲黑見先驅眩入

投床仆晨淹伏枕呼萬錢誰嘔泄一瘳爾乘除靜伏心
仍悸深調息亦羸跼嫌囚宇宙渴憶捲江湖風柳留
蟬蛻霜松映鶴孤養和懲往失凡名養和事見天隨子詩扶老念時
須杯杓歸神擔垣墻任佛踰回谿且垂翅望或在桑榆

綦威卿毅挽辭

東海子門舊桐鄉邑墓遷

綦東海人威卿之祖待制公知忻州因家焉

芝蘭

宜有種珠玉自成淵慈母依隣切名郎獲譽先豪華
非日損信厚出天然諳理言猶訥持心靜益專笑談

千里到咳唾百金捐論齒推予長垂髫得子賢通家仍
孔李知己與王田刻責誰斯切推扶最所偏孤嫠平日
託昆季再生緣摧割詩寧寫精微夢或傳都將百年淚
一慟夜臺前

老樹

老樹高留葉寒藤細作花沙平時泊鴈野迴已攢鴉旅
食秋看盡行吟日又斜干戈正飄忽不用苦思家

陽翟道中

長路伶俜裏羈懷莽蒼中
千山分落照萬籟入秋風
頻見參旗縮虛傳朔幕空
故園歸未得細問北來鴻

月觀追和鄧州相公席上韻

月觀知名舊池亭發興偏
露涼驚夜鶴風細咽秋蟬
絳泛兵厨酒紅依幕府蓮
無緣逐清景空羨飲中僊

太室同希顏賦

壯矣崧維岳盤盤上窈冥
中天瞻巨鎮元氣有遺形
雨入秦川黑雲開楚岫青
鰲掀一柱在萬古壓坤靈

送登封張令西上

罷縣人稱屈悠悠復此行
渭城秋鴈到秦嶺暮雲平
道路衣從典風塵劍已鳴
山西多俠客莫說是書生

方城道中懷山中幽居

枝拙違時用年饑與食謀
江山貧士嘆日月賈胡留
楚客頻招隱文園故倦游
衡門有幽事還我北窓秋

孟州夾灘飲承之御史家

同欽叔作

美酒禁愁得芳梅發興饒
紛紜聊且置礪砢故須澆
鷄

黍成前約千戈有此宵平生揚大理惜不預佳招

雲卿赴召

五日

笑

送曹吉甫兼及通甫

意氣羨君豪憐君屈騎曹安能事筆硯且復混弓刀風雪貂裘暗闕山馬骨高南飛見鴻鴈應為惜哀勞

勝槩

三鄉作

勝槩烟塵外新詩杖履間偶隨流水去澹與暮雲還吾道三緘口時情一解顏從今便高卧已負半生閒

少室南原

地僻人烟斷山深鳥語譁清溪鳴石齒暖日長藤芽綠
映高低樹紅迷遠近花林間見鷄犬直擬是仙家

寄贈龐漢茂弘

之子貧居久詩文日有功苦心唯我見高誼許誰同萬
里虎食肉一鳴鷄長雄皇天老眼在且莫怨丘中

洛陽古城曦陽門早出

乘月出曦陽黎明轉北岡荒村自鷄犬長路足豺狼天

地憐飄泊風霜憶閉藏微吟許行役淒斷不成章

聞希顏得英府記室

近得髯叅信知從兔苑游文星映朱邸勝槩減黃樓進
退存中道功名接上流徒懷貢公喜塵土隔瀛洲

落魄

落魄宜多病艱危更百憂雨聲孤館夜草色故園秋行
役魚鰕尾歸期烏白頭中州遂南北殘息付悠悠

得姪搏信二首

今日鄜州姪知從虎穴還百年陰德在幾日鬢毛班隔
關家仍遠羈棲食更艱誰憐西北夢依舊遶秦關
號驛傳家信坤牛玩吉占團圓知有望悲喜亦相兼過
眼書重展伸眉酒屢添關河動高興百遶望清蟾

阿千始生

四十舉兒子提孩聊自誇夢驚松出笋兆應竹生花田
不求千畝書先備五車野夫詩有學他日看傳家

長壽新居三首

同仲
經賦

地古村墟迥川迴縣郭斜蒲池餘老節菊水引去聲新芽

卜築欣成趣歸耕覺有涯迎門顧兒女今日是山家

隱去初心在親朋復此偕荒田歸別業高樹表新齋泉
石深三逕風塵限兩崖青山坐終日無物寄幽懷

昔有姜夫子來家寂寞濱墓田耕已熟碑石字猶新詩
酒娛中歲山林有外臣三生可信否吾亦記前身

宣和中姜

夢得處士常隱于此墓碣在馬夢得曾上書仁宗
既老以詩酒自娛碣文說地名白鹿原長壽村也

少林雨中

西堂三日雨氣節變蕭森偃卧復歌卧長吟時短吟鐘
魚四山靜松竹一燈深重羨禪棲客都無塵慮侵

十二月六日二首

俛鬼跳梁久羣雄結構牢天機不可料世網若為逃白
骨丁男盡黃金甲地高閭門隔九虎休續楚臣騷
海內兵猶滿天涯歲又新龍移失魚鱉日食鬪麒麟草
棘荒山雪烟花故國春聊城今夜月愁絕未歸人

得一飛姪安信

音問他鄉隔存亡此日知夢中憂凍餒意外脫艱危避
地何嗟及還家敢恨遲衰年吾事了似有鹿門期

短日

短日礧聲急重雲鴈影深風霜侵晚節天地入歸心零
落溝中斷酸嘶爨下音五年朝與夕清血幾沾襟

送母受益自潞府歸崧山

薄俗科名賤孤生志願違正須謀獨往何暇計羣飛泌
水真堪樂荊州況可依青山吾舊隱此日羨君歸

寄程孫鐵安

御史陰功在孫兒玉不如已能騎竹馬想亦愛銀魚異
縣關山闊衡門骨肉踈幾時隨阿舅盡讀外家書

贈汴禪師

道重疑高塞禪枯耐寂寥蓋頭茅一把繞腹篋三條趙
子曾相問馮公每見招風波門外客無事且相饒

己亥元日

五十未全老衰容新又新漸稀頭上髮別換鏡中人野

史纔張本山堂未買隣不成騎瘦馬還更入紅塵

送楊次公兼簡秦彥容李天成

海國山如染雲堆草易荒時危頻虎穴路絕更羊腸
弔影雙蓬鬢携家一藥囊殷勤秦與李無惜借餘光

發濟源

早曠今年劇他鄉底處歸羸糧失先具涉世本無機
棄擲烏皮几裴回白版扉殷勤雙語燕媿汝遠相依

倪庄中秋

巳亥

強飯日逾瘦，袂衣秋已寒。
兒童謾相憶，行路豈知難。
露氣入茅屋，溪聲喧石灘。
山中夜來月，到曉不曾看。

荅潞人李唐佐贈詩

聞道嗟予晚，求師愧子賢。
泥途終自拔，璞玉豈虛捐。
書破三千牘，詩論二百年。
文章有聖處，正脉要人傳。

陽興砦

亂石通樵逕，重崗擁戍城。
山川帶淳朴，鷄犬見升平。
雨爛沙仍軟，秋偏氣自清。
年年避營馬，幾向此中行。

由州入府

避騎兵奪馬
者多由此路

懷粹中

醉解不復寐吟君田舍詩從知石門老未比木庵師日
月淹書尺江山入鬢絲何因重談笑却似少林時

同周帥夢卿崔振之遊七巖

定襄
七巖

客路頻年別僧居半日閒同遊盡親舊舉目是家山世
事風塵外詩情水石間悠然一尊酒落景未知還

送崔振之迎家汴梁

金
夕
日
五
夕
三
卷
七
老伴不易得殘年惟有閒桑麻一村落鷄犬兩柴關樊
守能供酒周侯許買山從今釣溪上日日望君還

聚僊臺夜飲

永夜留懽席高懷遠市塵月涼衣有露風細酒生鱗鄉
社情親舊僊臺姓字新殷勤詩卷在長記坐中人

續陽平十愛

我愛陽平酒兵厨釀法新百金難着價一錢即醺人色
笑榴華重香兼竹葉醇為君畱故事喚作杏園春

杏園
指紀

子正家
園為言

送田益之從周帥西上二首

市近厨無肉書香蠹有蟲深居誰不樂

去聲

兀坐竟何功

天日伸眉後江山洗眼中蓬萊如可到剩借玉川風

有所

謂

一室盆歌後供樵只短僮求凰可無日牧犢未成翁桂
樹春風近揚萸煖律通明年孟德耀應與伯鸞東

九月晦日玉村道中

水涸沙仍濕霜餘草更幽烟光藏落景山色露清秋坐
食知何益行吟只自愁隨陽見鴻鴈三嘆惜淹留

十月四日往闕南二首

短日晨光澹高風宿靄澄山寒渾欲雪水涸劣能冰振

厲時何有躋攀倦不勝哦詩聊自遣松液已香凝

予方釀松

醪當以今日
熟故及之

行路見新月獨行還獨謠勞生塵衮衮晚色鬢蕭蕭野
曠無遺穗林疎有墮樵迴頭麥山嶺更覺馬蹄遙

寄王文德新二首

德新時
在汝州

沙際春還去，雲頭雨不成。興來誰共醉，事往獨含情。紫

邏留行客，黃流隔戍城。岸花何處在，空億擢歌聲。

孟津
時事

清汝風華地，平生記此游。酒能千日醉，春必萬金酬。攬

鏡非遲暮，逢花儘滯留。只應歌笑處，偏欠李鄜州。

欽叔
時赴

鄜州
幕官

舊國

舊國分崩久，孤兒展省初。客衣留手線，驛傳失肩輿。夢

拜悲兼喜心飛疾亦徐殷勤南去鴈先為到商於

和仲梁

林影兼秋薄雲陰帶晚涼石潭魚近藻沙渚鴈留霜笑

語無長路登臨豈異鄉一尊堪共醉惜不是重陽

鴈留霜作

霜含

甲辰夏五月積雨十餘日不止遣悶二首

甲子霖霖雨巡簷悶不禁幻泡成實相水樂激哀音瘴

海聞天漏堯年見陸沈騫飛想雲表癡坐若為心

南史王景

文傳人居貴要
但問心若為耳

甲子霖霖雨農郊搏手空排牆寧有禮為壑竟何功戰

蟻侯王上鳴蛙意氣中掃晴應曉夕少忍待秋風

排牆事見

王衍論云排牆之壓猶有禮也

陽泉樓雲道院

方外復方外脩然心迹清開窓納山影推枕得溪聲川
路遠誰到石田平可耕霜林不嫌客留看錦崢嶸

劉子中夢菴

寤寐生與死幻歟為是真如何夢中境不屬覺時人朝
徹從渠夜形開亦此神殷勤花上蝶分我漆園春

丙午九日詠菊二首

秋菊有何好祇緣風露清花中誰比數霜後獨鮮明九
日惜虛過一尊還自傾今年病居士吟繞更闌情
几案得新供小窻幽更宜風霜寧小怯根撥要深移黃
素金行正芳甘藥品奇三薰復三沐歲晏與君期

感事

壯事本無取老謀何所成人皆傳已死吾亦厭餘生潦
倒封侯骨淹留混俗情百年堪一笑辛苦惜虛名

酬中條李隱居邦彥

州路限南北相逢今白頭蟲沙非故國人物自名流學
道慙高步留詩惜暗投歸秦如有便終伴竹林游

邦彥
自闕

中徒步省其季父於
集寧故有竹林之句

送邦彥北行

比數推前輩陪從結後緣川涂即睽隔詩酒重留連白

鶴歸華表青牛得老僊泰山好行脚倚杖待明年

紫微劉丈

雅有游秦之興
故篇中有及

同龔丈明秀山行

暮景披橫幅山間二老同雲如愁戍苦雪亦笑詩窮古
木凍欲折斷崖行復通從今胡谷夢時到水聲中

同姚公茂徐溝道中聯句

路轉川塗闊天低雨氣昏綿山連漢壘汾水入并門來
往頻鞍馬登臨負酒樽聯詩強一笑淒絕恐銷魂

壬子月夕

明月復明月今年還遠游
關河動歸興時節重離憂
老眼耿無寐病身偏覺秋
遙憐小兒女把酒望東州

庚子三月十日作

殘夢忘書帙餘寒殢酒杯
青銅元懶照白紵更寬裁
水際時獨往花邊知幾迴
殷勤雙語燕應自謝家來

七月十六日送馮揚善提領闕中三教

為愛秦中好西遊日苦遲
青雲動高興白首得新知道

在貧何病官閑老更宜相思詩酒社無計與追隨

京兆漕司官居三首

符節推通貴江山入勝游名園隨地改高棟與雲浮簿
領歸閒暇鶯花接獻酬不知秋夜月何似庾公樓

複嶺雲橫野孤峯玉柱天遙知開館日別破見山錢夢
出紛華外詩來寂寞邊亭中誰舉酒高興相悠然

聞說梅軒好長吟有所思入簷看瘦影挂月見橫枝東
閣今千載風流彼一時西游曾有約到日更題詩

甲寅正月二十三日故關道中三首

雪碓不得過陽坡如見留林烟常暗澹木葉自颼颼
齒髮悲行役鶯花惜舊游塵埃與風雨看待幾時休
千里不易到三冬須少留居情猶晉產去意已雕丘
遠出每為苦雄夸還自羞君心未肯在應待肯時休
六十復半十年年添白頭祇知詩遣興未覺酒忘憂
人七因循過元宵塊坐休殷勤行記上今日是東州

送閻子實焦和之北上

秦府賢初聚瀛州路不遙謀謨在廊廟物色到漁樵布
褐豈終隱旌車匪見招春風兩黃鵠老眼看雲霄

庫城

浩浩庫城水岸高知幾尋疎林護懸險絕壁入清深跼
步無曠迹勞歌惟苦音年年一來此老我亦何心

婁生北上

并府虛荒久大城如廢村草茅知世故泉壤隔天閭六
月甘霖決一言陰理存明年佩符節知有奉春孫

遣興

几案滿書史欣然忘百憂一篇詩遣興三醺酒扶頭千
載陶元亮平生馬少游但留強健在老矣復何求

八月并州鴈

三鄉
時作

八月并州鴈清汾照旅羣一聲驚晚笛數點入秋雲滅
沒樓中見哀勞枕畔聞南來還北去無計得隨君

示白誠甫

之子吟爆竹迺公欣樹萱崑山多美玉江水發初源名

教有樂地詩書皆雅言通家吾未老倚杖望高軒

甲寅十二月四日出鎮陽寄宰魯伯

潯水曉光動羈橋詩境同衝寒騎瘦馬認影識衰翁長
路風聲裏孤城雪意中回頭歌笑處淒絕意何窮

送文生西行

今夜東山月隨人知幾程從軍少年事分守故鄉情渭
水風露早秦川烟樹平相招有仙掌無計與君行

乙卯十一月往鎮州

村靜鳥聲樂山低鴈影遙野陰時淠朗冷雨只飄蕭涉
遠心先倦衝寒酒易消紅塵忘南北渺渺見長橋

遺山集卷七

遺山集卷八

金元好問撰

七言律詩

秋懷

崧山中作

涼葉蕭蕭散雨聲
虛堂浙浙掩霜清
黃華自與西風約
白髮先從遠客生
吟似候蟲秋更苦
夢和寒鵲夜頻驚
何時石嶺關頭路
一望家山眼暫明

帝城二首

史院夜
直作

帝城西下望孤雲
半廢晨昏愧此身
世俗但知從仕樂
書生只合在家貧
悠悠未了三千牘
碌碌翻隨十九人
預遣兒書報歸日
安排雞黍約比鄰

羈懷鬱鬱歲駸駸
擁褐南窗坐晚陰
日月難淹京國久
雲山惟覺玉華深
鄰村爛熳雞黍局
野寺荒涼松竹林
半夜商聲入寥廓
北風黃鵠起歸心

僕射陂醉歸即事

多生曾得江湖樂每見陂塘覺眼明詩酒共尋前日約
風陰新自夜來晴春波澹澹沙鳥沒野色荒荒煙樹平
醉踏扁舟浩歌起不須紅袖出重城

是日招樂
府不至

春日

里社春盤巧欲爭裁紅暈碧助春情忽驚此日仍為客
却想當年似隔生貧裏齏鹽憐節物亂來歌吹失歡聲
南舟剩有還鄉伴戎馬何時道路清

歐陽唐春盤賦裁
紅暈碧巧助春情

為韻

橫波亭

為青口
帥賦

孤亭突兀插飛流，氣壓元龍百尺樓。
萬里風濤接瀛海，千年豪傑壯山丘。
疎星澹月魚龍夜，老木清霜鴻雁秋。
倚劍長歌一杯酒，浮雲西北是神州。

野菊座主閑閑公命作

柴桑人去已千年，細菊班班也自圓。
共愛鮮明照秋色，爭教狼籍臥疎煙。
荒畦斷壠新霜後，瘦蝶寒螿晚景前。
只恐春藂笑遲暮，題詩端為發幽妍。

度太白嶺往昆陽

斷崖絕壁裂蒼頑
竟日長林窈窕間
舊許煙霞歸白髮
悔隨塵土出青山
飢蠶泚泚催人老
野鶴昂昂羨汝閒
畏景方隆路方永
南風迴首暮雲還

寄希顏二首

後一首希顏在徐州幕時作

僵卧崧丘七見春
商餘歸計一塵新
悠悠華屋高賢意
兀兀田夫野老身
動色雲山如有喜
忘機鷗鳥亦相親
麕疎潦倒今如此
樓上元龍莫笑人

湖海故人仍騎曹彭門千里入憑高山頭杜甫長年瘦
樓上元龍先日豪水落魚龍失歸宿天長鴻雁獨哀勞
酒船早晚東行辦共舉一杯持兩螯

懷益之兄

時在
閬鄉

牢落關河雁一聲干戈滿眼若為情三年浪走空皮骨
四海相望只弟兄黃耳定從秋後到白頭新自夜來生
西樓日日西州道欲賦窮愁竟不成

昆陽二首

古木荒煙集暮鴉，高城落日隱悲茄。
并州倦客初投迹，楚澤寒梅又過花。
滿眼旌旗驚世路，閉門風雪羨山家。
忘憂只有清樽在，暫為紅塵拂鬢華。

去日黃花半未開，南來忽復見寒梅。
淹留歲月無餘物，料理塵埃有此杯。
老馬長途良憊矣，白鷗春水亦悠哉。
商餘說有滄州趣，早晚乾坤入釣臺。

寄西溪相禪師

青鏡流年易擲梭，壯懷從此即蹉跎。
門堪羅雀仍未害，

釜欲生魚當奈何萬事自知因嬾廢一官元不校貧多
拂衣明日西溪去且放雲山入浩歌

葉縣雨中

時崧前
旱尤甚

春旱連延入麥秋今朝一雨散千憂龍公有力迴枯槁
客子何心歎滯留多稼即看連楚澤歸雲應亦到崧丘
兵塵浩蕩乾坤滿未厭明河拂地流

寄答趙宜之兼簡溪南詩老

窗影朧朧納暝陰風聲浩浩急霜砧秋鴻社燕飄零夢

潁水崧山去住心黃菊有情留小飲青燈無語伴微吟
故人憔悴蓬茅晚料得老懷如我今

潁亭

潁上風煙天地迴潁亭孤賞亦悠哉春風碧水雙鷗靜
落日青山萬馬來勝概消沈幾今昔中年登覽足悲哀
遠遊擬續騷人賦所惜匆匆無酒杯

山中寒食

小雨班班浥曙煙平林簇簇點晴川清明寒食連三月

潁水崧山又一年樂事漸隨花共減歸心長與鴈相先
平生最有登臨興百感中來只慨然

楚漢戰處

同欽叔賦

虎擲龍拏不兩存當年曾此睹乾坤一時豪傑皆行陣
萬古河山自壁門原野猶應厭膏血風雲長遣動心魂
成名豎子知誰謂擬喚狂生與細論

懷叔能

別却楊侯又一年西風每至輒淒然酒官未得高安上

詩印空從吏部傳三沐三薰知有待一鳴一息定誰先
黃塵憔悴無人識今在長安若箇邊

留別仲澤

避俗無機日見侵逐貧不去巧相尋半生與世未嘗合
前日入山唯不深綠水紅蓮慚大府清泉白石識初心
相思命駕非君事能寄詩來或賞音

鄭州上致政賈右丞相公

時放命就公
訪先朝逸事

黃閣歸來履舄輕天將五福畀康寧四朝人物推耆舊

萬古清風在典刑，鄭圃亦能知。
有道漢庭久欲訪，遺經帝城北復瞻。
依近長傍弧南候，極星。

寄答景玄兄

故人相念不相忘，頻著書來約對床。
甚喜樵夫與爭席，所憂簿吏復登堂。
春風和氣隨詩到，洛水秦山引興長。
奮袖高談夜窗白，幾時危坐聽琅琅。
為催科所困
簿吏復登堂李長吉語景玄去歲大

寄辛老子

草堂西望渺煙霞夢寐西南一逕斜為羨鸞凰安枳棘
悔將猿鶴入京華百錢卜肆成都市萬古詩壇子美家
後日從翁問奇字可能逋客待侯芭

後灣別業

薄雲晴日爛烘春高柳清風便可人一飽本無華屋念
百年今見老農身童童翠蓋桑初合灩灩蒼波麥已勻
便與溪塘作盟約不應重遣濯纓塵

劉丈仲通哀挽

拙宦深辜遠業期無兒更結下泉悲溫純如此豈復見
報施言之尤可疑四葉名家今日盡百年潛德幾人知
元劉交分平生重才薄猶堪第二碑

會善寺

白塔沈沈插翠微魏家宮闕此餘基人生富貴有遺恨
世事廢興無了期勝概只今歸鷺嶺煙花從昔繞龍墀
長松想是前朝物及見諸孫賦黍離

寄欽用

顛顛京華首宿盤南山歸興夜漫漫長門有賦人誰買
生塌無瓊客亦寒恁臂偶然煩造物塵頭何者亦求官
故人東望應相笑世路羊腸乃爾難

楊之美尚書挽章

冠蓋龍門此日空人知麟出道將窮景星明月歸天上
和氣春風在眼中千古孫劉有餘責一時燕許更誰同
受恩知己無從報獨為斯文泣至公

李屏山挽章二首

世法拘人虱處禪忽驚龍跳九天門牧之宏故見文筆
白也風流餘酒尊落落久知難合在堂堂元有不亡存
中州豪傑今誰望擬喚巫陽起醉魂

談麈風流二十年空門名理孔門禪諸儒久已同堅白
博士真堪補太玄孫況小疵良未害莊周陰助恐當然
遺編自有名山在第一諸孤莫浪傳

內鄉縣齋書事

吏散公庭夜已分寸心牢落百憂薰催科無政堪書考

出粟何人與佐軍
飢鼠遶床如欲語
驚烏啼月不堪聞

扁舟未得滄浪去
慚愧春陵老使君

遠祖次山春陵行云思欲委符節引

竿自刺船故子美有興含滄浪清之句

自蒲潭丹水還寄崧前故人

臘雪春泥晚未乾
馬迎殘照入荒寒
初無鳬舄將安往
正有牛刀恐亦難
倦客不知歸路遠
孤城唯覺暮山攢
黃金鍊出相思句
寄與同聲別後看

被檄夜赴鄧州幕府

幕府文書烏羽輕敝裘羸馬月三更未能免俗私自笑
豈不懷歸官有程十里陂塘春鴨鬧一川桑拓晚煙平
此生只合田間老誰遣春官識姓名

馬鄧驛中大雨

萬壑千岩一雨齊先聲噴薄捲湍溪投林鳥雀不暇顧
移穴蛟龍應自迷便恐他山藏厚夜豈知高樹有晴霓
兩江合向西南鬪坐想風雲入鼓鼙

馬鄧西南兩浙水相合處也

除夜

一燈明暗夜如何夢寐衡門在澗阿物外煙霞玉華遠
花時車馬洛陽多折腰真有陶潛興扣角空傳甯戚歌
三十七年今日過可憐出處兩蹉跎

鄧州相公命賦喜雨

輕陰十日暮春前和氣朝來已沛然河澗定應連上國
雲來端合自中天

帥從洛陽移鎮

烽零帶濕閒幽障麥壠分青

入廢田共識使君霖雨手調元消息在今年

劉光甫內鄉新居

秀冠平日凜秋霜老去聲名只閉藏父老漸來同保社
兒童久已愛文章疏隨隙地皆成圃竹放新梢欲過牆
為向長安舊遊道世間元有北窗涼

西齋夜宴

飄零無物慰天涯酒伴相逢飲倍加悞謬君當略彭澤
迴旋我亦笑長沙金釵醉舞迎春髻銀燭光搖半夜花
只欠東山游錄事不來堅坐看紛譁

叔能信之張杜諸人皆在而麟之獨

不至

十月

十月長年見早梅今年二月未全開
春寒春暖花如故
年去年來老漸催
大藥誰傳軒后鼎
習仙虛築漢宮臺
憑君撥置人間事
不負浮生只此杯

送吳子英之官東橋且為解嘲

柴車歷鹿送君東
萬古書生蹭蹬中
良醞暫留王績醉
新詩無補玉川窮
駒陰去我如決驟
蟻垤與誰爭長雄
快築糟丘便歸老
世間馬耳過春風

張王簿草堂賦大雨

浙樹蛙鳴告雨期忽驚銀箭四山飛
長江大浪欲橫潰厚地高天如合圍
萬里風雲開偉觀百年毛髮凜餘威
長虹一出林光動寂歷村墟空落暉

橫去聲

丹霞下院同仲澤鼎玉賦

時從商帥軍至南陽

鞍馬匆匆去復還霜鍾今得見豐山
千年香火丹霞老滿眼興亡白水閒
壯志自憐消客路深居誰得似禪關
只應頻有西來夢夜夜青林杳靄間

春日半山亭游眺

日照春山花滿煙獨攜尊酒北江邊
江流衮衮望不極世事悠悠私自憐
小草不妨懷遠志芳蘭誰為發幽妍
千年石壁留詩在會有騷人一慨然

別程女

芸齋浙浙掩霜寒別酒青燈語夜闌
生女便知聊寄託中年尤覺感悲歡
松間小草栽培穩掌上明珠棄擲難
明日緱山東畔路野夫懷抱若為寬

出山

松門石路靜無闌，布襪青鞋幾往還。
少日漫思為世用，中年直欲伴僧閒。
塵埃長路仍回首，升斗微官亦強顏。
休道西山不留客，數峰如畫暮雲間。

謝鄧州帥免從事之辟

憂端擾擾力難任，世事駸駸日見臨。
三載素冠容有愧，一時墨綬果何心。
首丘自擬終殘喘，陟屺誰當辨苦音。
遙望朱門涕橫落，相公恩德九泉深。

新野先主廟

次鄧
坤韻

一軍南北幾扶傷
長坂安行氣已王
豪傑盡思為漢用
江山初不假吳強
兩朝元老心雖壯
再世中興事可常
寂寞永安宮畔土
爭教安樂似山陽

石門

兩崖橫絕倚山垠
草徑低迷劣可分
潭影乍從明處見
竹香偏向靜中聞
石林萬古不知暑
茅屋四鄰惟有雲
曳杖行歌羨樵叟
此生何計得隨君

獨峰楊氏幽居

村墟滿洒帶新晴落日千山一片青
世外衣冠存大朴雲間雞犬亦長生
清江兩岸多古木平地數峰如畫屏
惆悵朝陽一茅屋酒船茶竈負生平

渡湍水

湍作專呼
見水經

悠悠人事眼中新悄悄孤懷百慮紛
伎倆本宜閒處著姓名誰遣世間聞
秋江澹沲如素練沙浦空明行暮雲
早晚扁舟載煙雨移家來就野鷗羣

十日登豐山

十日登高發興新，豐山孤秀出塵氛。
村墟帶晚鴉噪合，林壑得霜煙景分。
芳臭百年隨變滅，短長千古只紛紜。
詩成一歎無人會，白水悠悠入暮雲。

岐陽三首

突騎連營鳥不飛，北風浩浩發陰機。
三秦形勝無今古，千里傳聞果是非。
偃蹇鯨鯢人海涸，分明蛇犬鐵山圍。
窮途老阮無奇策，空望岐陽淚滿衣。

百二關河草不橫十年戎馬暗秦京岐陽西望無來信
隴水東流聞哭聲野蔓有情縈戰骨殘陽何意照空城
從誰細向蒼蒼問爭遣蚩尤作五兵

耿耿九虎護秦關懦楚孱齊机上看禹貢土田推陸海
漢家封徼盡天山北風獵獵悲砧發渭水蕭蕭戰骨寒
三十六峰長劍在倚天仙掌惜空閒

圍城病中文舉相遇

擾擾長衢日往回病中聊得避喧埃愁多頓覺無詩思

計拙惟思近酒杯
潘岳鏡中渾白髮
江淹門外即蒼苔
生涯若被傍人問
但說經年鼠不來

讀靖康僉言

浚郊沙海浩茫茫
河廣纔堪一葦航
顛沛且當懲景德
規模何必罪朱梁
滄溟不掩蛟龍窟
大地同歸雀鼠鄉
三百年間幾降虜
長星無用出光芒

雨後丹鳳門登眺

絳闕遙天霽景開
金明高樹晚風迴
長虹下飲海欲竭

老鴈叫羣秋更哀
劫火有時歸變滅
神嵩何計得飛來
窮途自覺無多淚
莫傍殘陽望吹臺

京居辛卯八月六日作

四壁秋蟲夜語低
南窗孤客枕頻移
野情自與軒裳隔
旅食難堪日月遲
平子歸田元有約
魏舒襜被恐無期
一莖白髮愁多少
慚愧家人賦戾戾

浩然師出圍城賦鶴詩為送

夢寐西山飲鶴泉
羨君歸興渺翩翩
昂藏自有林壑態

飲啄暫隨塵土緣，遼海故家人幾在。
華亭清唳世空憐，明年也作江鷗去。
水宿雲飛共一天。

追用座主閑閑公韻上致政馮內翰二首

峻坂平生幾疾驅，歸休甫及引年初。
東門太傅多祖道，北闕詩人休上書。
阜樞老歸千里驥，白雲閒釣五溪魚。
非熊有兆公無恙，會近君王六尺輿。

草堂人物列仙臞，萬壑松風酒一壺。
少日打門無俗客，老年爭席有樵夫。
巨源不入竹林選，元亮偶成蓮社圖。

野史他年傳耆舊風流一一似公無

懷秋林別業

茅屋蕭蕭浙水濱
豈知身屬洛陽塵
一家風雪何年盡
二頃田園入夢頻
高樹有巢鳩笑拙
空牆無穴鼠嫌貧
西南遙望腸堪斷
自古虛名只誤人

壬辰十二月車駕東狩後即事五首

翠被蔥蔥見執鞭
戴盆鬱鬱夢瞻天
只知河朔歸銅馬
又說臺城墮紙鳶
血肉正應皇極數
衣冠不及廣明年

何時真得攜家去萬里秋風一釣船

慘澹龍蛇日鬪爭干戈直欲盡生靈高原水出山河改
戰地風來草木腥精衛有冤填瀚海包胥無淚哭秦庭
并州豪傑今誰在莫擬分軍下井陘

鬱鬱園城度兩年愁腸飢火日相煎焦頭無客知移突
曳足何人與共船白骨又多兵死鬼青山元有地行仙
西南三月音書絕落日孤雲望眼穿

萬里荆襄入戰塵汴州門外即荆榛蛟龍豈是池中物

蟣虱空悲地上臣
喬木他年懷故國
野煙何處望行人
秋風不用吹華髮
滄海橫流要此身

五雲宮闕露盤秋
銀漢無聲桂樹稠
複道漸看連上苑
戈船仍擬下揚州
曲中青冢傳新怨
夢裏華胥失舊遊
去去江南庾開府
鳳凰樓畔莫迴頭

永寧南原秋望

浩浩西風入敝衣
茫茫野色動清悲
洗開塵漲雨纔定
老盡物華秋不知
烽火苦教鄉信斷
砧聲偏與客心期

百年人事登臨地落日飛鴻一線遲

中秋雨夕

商仲國器
吳中作

南樓高興在胡床十日秋陰負一觴
庾老未應妨嘯詠素娥多自怨昏黃
此生此夜不長好行雨行雲有底忙
却恐哦詩太愁絕且燒銀燭看紅粧

癸巳四月二十九日出京

塞外初捐宴賜金當時南牧已駸駸
只知灞上真兒戲誰謂神州遂陸沈
華表鶴來應有語銅槃人去亦何心

興亡誰識天公意留著青城閱古今

國初取宋於青城受降

喜李彥深過聊城

圍城十月鬼為鄰異縣相逢白髮新恨我不如南去鴈
羨君獨是北歸人言詩匡鼎功名薄去國虞翻骨相屯
老眼天公只如此窮途無用說悲辛

與張杜飲

故人寥落曉天星異縣相逢覺眼明世事且休論向日
酒尊聊喜似承平山公倒載羣兒笑焦遂高談四座驚

轟醉春風一千日愁城從此不能兵

秋夕

小簟涼多睡思清一窗風雨送秋聲
頻年但覺貂裘敝萬古何曾馬角生
寄食且依嚴尹幕附書誰往鄧州城
澆愁欲問東家酒恨殺寒雞不肯鳴

夢歸

顛顛南冠一楚囚歸心江漢日東流
青山歷歷鄉國夢黃葉蕭蕭風雨秋
貧裏有詩工作祟亂來無淚可供愁

殘年兄弟相逢在隨分
齏鹽萬事休

白屋

白屋寒多愛夕曛
靜中歸思益紛紛
長門誰買千金賦
祖道虛陳五鬼文
地盡更無錐可置
竈閒惟覺井長勤
明年准擬萊蕪住
寄謝東鄰范史雲

淮右

淮右城池幾處存
宋州新事不堪論
輔車謾欲通吳會
突騎誰當擣薊門
細水浮花歸別澗
斷雲含雨入孤村

空餘韓渥傷時語留與景臣一斷魂

徐威卿相過留二十許日將往高唐同李輔之
贈別二首

衣冠八座文昌府襍被三年同舍郎蕩蕩青天非向日
蕭蕭春色是他鄉傷時賈誼頻流涕卧病王章自激昂
保社追隨有成約不應關塞永相望

東南人物未彫零和氣春風四座傾但喜詩章多俊語
豈知談笑得新名二年阻絕干戈地百死相逢骨肉情

別後相思重回首杏花尊酒記聊城

即事

逆豎終當鱗縷分揮刀今得快三軍
燃臍易盡嗟何及遺臭無窮古未聞
京觀豈當誣翟義衮衣自合從高勲
秋風一掬孤臣淚叫斷蒼梧日暮雲

望王李歸程

一褐霜寒晚思孤眼中行李見歸途
虞卿仲子死不朽石父晏嬰今豈無
義士龍沙元咫尺累臣駒隙自舒徐

何時斗酒歡相勞
驚看燕家頭白烏

秋夜

九死餘生氣息存
蕭條門巷似荒村
春雷謾說驚坯戶
皎日何曾入覆盆
濟水有情添別淚
吳雲無夢寄歸魂
百年世事兼身事
尊酒何人與細論

甲午除夜

暗中人事忽推遷
坐守寒灰望復燃
已恨大官餘麪餅
爭教漢水入膠船
神功聖德三千牘
大定明昌五十年

甲子兩周今日盡空將哀淚洒吳天

乙未正月九日立春

十度新正九處家今年癡坐轉堪嗟一冬殘雪不肯盡
連日苦寒殊未涯重碧總誇燕市酒小紅誰記上林花
殘魂零落今無幾乞與春風惱鬢華

杏花落後分韻得歸字

懶髓能醫病頰肥鸞膠無那片紅飛殘陽淡淡不肯下
流水溶溶何處歸煮酒清林寒食過明粧高燭賞心違

寫生正有徐熙在漢苑招魂果是非

三仙祠

三仙祠下往來頻憔悴征衫滿路塵
簫鼓未休寒食酒樵蘇時見舊都人
吹殘芳樹紅仍在展破平田綠已勻
西北并州隔千里幾時還我故鄉春

送輔之仲庸還大梁

驂騑爭道渺翩翩誰遣風塵失壯年
四壁舊聞懸磬宅一囊今有賣書錢
淋浪別酒青燈夜滅沒孤帆落照邊

想得還家過春半故山喬木滿蒼煙

繡江泛舟有懷李郭二公

荷花如錦水如天狼籍秋香擁畫船
長白風煙最瀟灑外臺賓主重留連
勝遊每恨隔千里樂事便當論百年
咫尺西州兩詩客不來同作飲中仙

送杜子

洛陽塵土化緇衣又見孤雲著處飛
北渚曉晴山入座東原春好妓成圍
來鴻去燕三年別深谷高陵萬事非

轟醉春風有成約可能容易話東歸

眼中

眼中時事益紛然擁被寒窗夜不眠
骨肉他鄉各異縣衣冠今日是何年
枯槐聚蟻無多地秋水鳴蛙自一天
何處青山隔塵土一菴吾欲送華顛

送杜招撫歸西山

杜乳後為黃冠師

少日先聲懾虎貔只今騎馬欲雞棲
邯鄲枕上人初覺秋水篇中物已齊
父老樵漁知有社將軍桃李自成蹊

因君喚起思鄉意君在西山我更西

寄欽止李兄

征車南北轉秋蓬關塞相望兩禿翁
衮衮便當隨世路悠悠難復倚天公
銅駝荊棘千年後金馬衣冠一夢中
尊酒雲州古城下幾時攜手哭春風

有寄

飛鴻來處是營平喜向斜封見姓名
千里呂安思叔夜五更殘月伴長庚
關河秋興風景暮長路渴心塵土生

南渡詩人吾未老幾時同醉鳳凰城

鎮州與文舉百一飲

翁仲遺墟草棘秋蒼龍雙闕記神州只知終老歸唐土
忽漫相看是楚囚日月盡隨天北轉古今誰見海西流
眼中二老風流在一醉從教萬事休

別王使君丈從之

謝公每見皆名語白傳相看只故情尊酒風流有今夕
玉堂人物記昇平泰山北斗千年在和氣春風四座傾

別後殷勤更誰接只應偏憶老門生

寄汴禪師

師舊隱
濟源

白頭歲月生詩窮止有相逢一笑同
齊粥空疎想君瘦
冠巾收斂定誰公
夢魂歷歷山間路
世事悠悠耳外風
見說懸泉好薇蕨
草堂知我是鄰翁

時汰逐釋老家甚
急故有中冠收斂

之
句

衛州感事二首

神龍失水困蜉蝣
一舸倉皇入宋州
紫氣已沈牛斗夜

白雲空望帝鄉秋
劫前寶地三千界
夢裏瓊枝十二樓
欲就長河問遺事
悠悠東注不還流

白塔亭亭古佛祠
往年曾此走京師
不知江令還家日
何似湘纍去國時
離合興亡遽如此
棲遲零落竟安之
太行千里青如染
落日欄干有所思


落日一作獨凭

望蘇門

諸父當年此往還
客衣塵土淚班班
太行秀發眉宇見
老阮亡來尊俎閒
出岫暮雲歸有處
投林孤鶴杳難攀

湧金亭上秋如畫興在青林杳靄間

遺山集卷八



總校官庶吉士臣張能照

校對官編修臣閔惇大

騰錄監生臣吳中嵐

騰錄監生臣吳魯田